

## ABHOLUNG

Mundschenk geht ca. 3 Stufen die Leiter hoch und wendet sich an seinen Jahrgang:

- „Ich steijn sou gern in de Öffentlichkeit – un ehr Leit  
⇒ Jahrgang „jetz isses soweit“
- „In meiner Brust steckt Amorspfeil“  
⇒ Jahrgang „leider geil“
- „Ich steijn uff de Ladn, weil..“  
⇒ Jahrgang „leider geil“
- „Ich häbb die Ehre sie als 1. zu begrieße, weil..“  
⇒ Jahrgang „leider geil“

Mundschenk steigt die Leiter hoch zum Kerbmädschen

„Mit wacklische Boa bin ich do ruff gekräwwelt,  
un bin vun doim Oublick noch goanz benewwelt.

Hier uwwe ougekumme is es e Muss,  
von dir zur Begrüßung en dicke Kuß!!!“

Mundschenk jetzt zum Jahrgang

„Wenn ich se sou säh schwinne mer die Sinne,  
ich doun gor nit die rischtische Worte finne.  
Drum helft mer Jungs! Oans geijt immer noch  
- Un die Zimmner Kerb sie läwe ...“

KERBMÄDSCHEN:

Heit steijn ich hier uwwe om Fenster, es is soweit,  
mer zirrern die Knie, äwwer ich bin bereit.  
Ob heit mit eich zusamme die Kerb zu feiern,  
den oan oder oannern Spruch beizusteiern.

Moi Läwe long häbb ich druff gewart,  
jetzt geijt moi Kerbgeschichte an de Start!

Ich fraan mich mit eich zu singe, zu danze und zu lache,  
vun moijens bis owends jeden Spaß mitzumache.  
In denne Joahrn, die in Zukunft sin,  
is mim Friehshoppe bei mir de Beginn!.

⇒ Mundschenk ..“un es Kerbmädsche läwe..“

Gonz Zimmern hot sich forn Umzug in die Reih gemacht,  
die Birke geschmickt, die Foahne ougebracht.

Äwwer bevor´s rischtisch los geijt kumm ich noch awwe  
Wou moin Joahrgong dutt uff mich watte.

Doch gonz alloa kimm ich nit do raus,  
moin Kerbvadder watt unne, moin Mundschenk voraus!

Äwwer e Gläsche Sekt, des trinke mer noch,  
un die Zimmer Kerb sie läwe...hoch....

---

## KERBREDD:

---

Guuuure ehr Leit, seid´er all do?  
Sou fängt des Joahr de Kerbspruch ou...

Noch´m Umzug häbht er de Wesch do her gefunne  
Ich hoff, ehr häbht ach all genunk Platz do unne?

Sou häwwe mer uns all vor de Hall do versammelt,  
Un jetzt wer die Red gehole – nit gestammelt.

Blau-weiß Kerb 2012, ... do häwwe mer long druff gewart,  
glei geijt´s lous – unser Mädche macht de Start.

---

Doch bevor mer beginne, will ich glei ebbes soue:  
Des Joar wird koa Redd vun de Gabi vorgetroue.

27 Joahr long hot se die Kerbredd geschrewe,  
mit gonz spitze Ferrern die Leit zum Lache getrewe.

Do bleibt uns nor oans: Mer soue LAUT Danke!!!!  
....Un schun fällt mer koan Roim oi...do muss ich erst emol oan tanke!!!!

Un bis mer beginne, en Gruß an die Kapell.  
singe mer zamme es Kerblied...äwwer schnell!!!!

---

Ohne grouß Pallawer mache mer uns nit long erimm.  
drumm soue mer eich sofort un direkt wer mer sinn:

Nina =  
Moin Mundschenk, do steijt er, hier un heit,  
Daniel Simon, de Sohn vun zwaa Handballers Leit.

Un in de Kerbgeschichte kennt ehr´s all läse,  
soin Opa, de Eugen, is 1950 Kerbvadder gewese.

Steffen =  
Unser Kerbmädche is e Pracht, un steijt do näwe.  
Wou se raus kimmt? Des is glei beschrewe.

Des goldisch Ding dud unser Kepp all zerzause.  
Es is die Nina Hillerich vun Schlaggehause.

En Silwerne nächst Joahr is ern Vadder, de Frank,  
die Modder hast Michaela, vielleicht als gebohr´ne Schobert bekannt.

Un wer´se als noch nit kennt dem soue mer´s ohne veel tratra,  
ehr Oma is die Obmanns Giesela.

Simon =

Des iss´er de Kerbvadder guggt´en eisch gut ou,  
der kimmt beim Vorschelle als letztes drou.

Soin Nome is Steffen Hess und der is schwer in de Reih.  
Soin Vadder de Thilo is bei de Fanfahr´n gonz vorne debei.

Die Modder kennt ehr aa, blau-weiß, des is kloar,  
es is die Kirsten, em Beutel soi Kerbmädsche vor 30 Joahr.

Steffen =

Unser Nome sin jetz bekannt, jetz wisst´er Bescheid.  
Ich hoff´ehr seid all fer de Kerbspruch bereit.

---

Jetzt geijt´s lous:

Des Joahr uff Pingste häwwe sich poar Kerbborschte zamme uffgerafft  
un häwwe – weil ses nit obwadde kenne – en Ausflug uff e oanner Kerb gemacht.

Die Stimmung woar gut, des Bier floss reichlich,  
doch Kerb is nit Kerb, des wisst ehr freilich.

Oaner vun denne hot de Schluß nit erlebt,  
der wurd vun de Oannern schlofend on de Boahnhof gelegt.

Endlich woars soweit, de Zug fährt oi  
Un mim volle Kopp hippe se eilisch in de Wagon enoi.

Erst in Kloa-Zimmern, fast schun dehoam,  
werds denne uff oamol gonz scheij woarm

Denn jetz erst fällts denne Buwe wirrer oi,  
ehrn Kumpel muss noch uff dere Benk oam Boahnhof soi.

Noch veel he un här gings also retour  
⇒ UFF E 90 EURO TAXI TOUR!

Doch kaum sin se dort, kenneses nit fasse;  
Do leit er als noch genauso wie sen häwwe leie lasse!

Un die Moral vun dere Geschicht,  
e Kerb in nem oannern Ort – des lohnt sich nicht!!

For die Story, ihr kennt´s fast erahne,  
singe mer "Auf der schwäbschen Eisebahne"!

---

---

---

Beim Jahrmarkt is oam Veroine wos gonz bleedes bassiert.  
Die häwwe sich beim Uffbau ziemlich blamiert.

Freidoachs middoachs steijn die Leit zum Schufte parat,  
des dauert soi Zeit, ´s is aa de älteste Stand uffem Moart.

Noch e paar Stunn woarn se ferdisch un gugge sich sou im.  
Do fällt oam uff: "Her, do steijt ja noch unsern Kiehlwoue erimm?!?!?"

Midde uffem roure Platz steijt der Karrn un all schenne im Chor:  
Des Ding hätt dehinner gesollt un nit devor!!!

Die häwwe nit long gefaggelt un glei Hilf´ organisiert,  
mit e bißje Technik un "uff drei" den komplette Stand paar Meder noch vorne buxiert.

Mit vereinte Kräfte den Woue ins Eck gezerrt damit´s blouß koaner sieht,  
un "uff 3" den Stand wirrer zerick als wär nie was bassiert.

Wos des gonze äwwer aa wirrer scheij macht, des kann ich eich soue.  
Vun de onnern Veroine häwwe se all kräftisch geholfe beim Troue.

Mer derf ja koan Nome nenne wem sou ebbes bassiert...  
beim Lied vom "Häschen in der Grube" hot´s gewiss sou mancher kapiert.

---

---

Am Fest der Auferstehung, also on Oastern souzusuou,  
hot sich bei de Reiter draus ebbes zugetroue.  
Wie alle Joahr git´s nit nur die bunde Eier,  
sondern aa des riesische Osterfeier.

Iwwer die Gräiß lāsst sich ja bekanntlich streire,  
denke sich die Reiter beim Vorbereite.  
Drum häwwe se des Joahr gonz ohne Bedacht,  
en riese Haufe zum Oustecke gemacht.

Un anstatt e bissje zu bremse orrer ebbes dogeije zu soue,  
hot en Bauer aus de Nochberschaft aa soi Zeig dezugetroue.

Om Owend woar´s donn endlich soweit,  
veel Leit woarn zum Gucke raus uff de Platz geeilt.  
Gonz gespannt un werklisch stolz,  
zündete se´n ou – de Haufe Holz.

Ach herrje – so schnell konnt mer nit gugge,  
rundherim die Leit om Zoammezucke.

Lichterloh brannte des Feier empor,  
so riesisch und houch wie noch nie zuvor.

Bis noch Dibborsch konnt mer die Flamme lodern sehn,  
die Polizei voll Panik „was ist da denn geschehn?!“

Sofort häwwe se en Löschezug eriwwer geschickt,  
donn woars vorbei mit denne Reiter ehm Oasterglick.

Zum Schluß für die Reiter, hart äwwer fair,  
singe mer es Lied vun de Feierwehr.  
„Hurra hurra die Feuerwehr ist da...“

---

Wie´s sou is beim Häusche renoviern,  
kann oam sou manches Malheur bassiern.

„Alla los“ hot sich e jung Pärsche aus Zimmern gedacht,  
un hot sich sou glei on die Ärwet gemacht.

Do hilft koa fluche, do hilft koa schenne,  
in de Klo muss aa e nei Klodeer enne.

Die Schlinke muss ab, do lässt sich de Hausherr nit lumbe,  
sonst doan se beim Droue es Dreppehaus noch verstumbe.

Mit vereinte Kräfte wird die Deer in die Oangel gefiehart,  
e bissje gestumpt, gewackelt un arretiert.

Die Deer fällt in´s Schloss un em Hausherrn fällt´s oi  
„Misst an dere Deer nit e Schlinke drou soi?“

De Fraa werd´s Oangst - un ehm werds boange  
Wie solle se jetz nur wirrer noch auße gelange`??!!

Des misst doch aa ohne Schlinke funktioniern  
Un die zwaa fange ou e wink zu experimentiern

Die Zouhberschte ins Loch un die Hoarklammern hinnerher  
Doch die Deer bewegt sich koan Milimeter mehr

Denne zwaa kimmts vor wie etliche Stunne  
Als se endlich häjern dass die Nochbern hoam kumme

Was häwwe die sich gefraaht die Fraa um Hilfe zu freije,  
ehr kennst eich denke, die zwaa worn gonz scheij verleije

Die Balkondeer steijt sperroangelweit uff,  
sou kimmt die Fraa donn zum Glick ach enuff.

Die Schlinke ins Loch un runner gedrickt,  
fer die Hausherrn woars es greijste Glick.  
Selbstlose KloBefreiungsAkte – es is nit iwwertrewe,  
in Zimmern werd Nochberschaftshilfe noch grouß geschrewe.

Do det ich soue, mer hewe all unser Glas,  
denn in Freiheit macht es Läwe doch veel mej Spaß – Prost!

---



Sellemols uffem Bauhof vun Zimmern,  
wou sich die Awwerter um de Leit ehrn Krempel kimmern.

Kimmt oaner vorbei mim Foahrrod im Gepäck,  
un seigt: „Guuure ehr Leit, des Ding muss weg!“

Die stelle´s in´s Eck un denke debei,  
„Eischentlich is des Road noch gonz in de Reih!

Des behoale mer mol, es wär doch sunst schoad,  
oannern bezoahle veel Geld fer sou e Road.“

Om nächste Mojend uffem Bauhof, de erste Ton  
klingelt glei emol es Telefon.  
Goanz uffgerescht am oannern End vum Apparat,  
de Kerl vun gestern –"wisse se ? Der mit dem Road!!!"

Dehoam hätt´s ordentlich Zores gewwe,  
desdeweije ded er gern soi Road wirrer häwwwe.

Heeer, wos en Zoff un wos e Blamasch,  
de alde Bock fer de Bauhof steijt deham in de Garasch!!!

Do druff speelt die Kapell gonz fröhlich und froh,  
.."ja mer sin mim Radl do!"

---

Kennt ehr Schilda? Des is in em Märsche e kloa Kaff.  
Die mache dort Sache, do biste echt baff!

Sou e Aktion wie bei denne is aa in Zimmern bassiert.  
Gebt mer jetz owwacht, woanns eich interessiert:

Mer häwwe nit blous Kinnergärte von de Kersch un de Gemoa,  
noa, aa Private doun Kinner betreue, e gut Sach, des is gonz kloar!

Sou en Loare wollt e Schaukel -orrrer sou ebbes- in soin Goarde stelle.  
Do brauch mer nadierlich Löscher im Borrem, es best gemoacht mit errer Schipp  
orrrer ner Kelle.

Äwwer se sinn nit weit kumme, die Löscher woarn oafach nit scheij,  
"Eijendwie muss des doch aa oannerst geij!!!???"

En Schlachtplan musst her un jetz hoalt eich gut fest:  
Mim Staubsauger häwweses prowiert!!! Er Leit wos e Fest!!!!

Stunnelang gesaugt, jeder Krimmel un jed' Korn.  
Sou dauerts halt e paar Doag länger sou e Loch...äwwer es is worn.

Vum Staubsauger in e Emmersche, vund dort in en Karrn  
un woann der Schubkarrn voll woar, doann erst on oam Stick fort gefoahrn...

Woche später, die Schaukel steijt un die Kinner sin frou....  
als Mamutprojekt kimmt jetz en neie Sandkaste drou?

Wos soll mer do singe? Mer fällt groad nix oi.  
Speelt halt: "Es is sou scheij, es is sou foi..."

---

Die Spätsommersonne strahle genieße,  
un sich de bei en Ferrerweißer in de Kopp enne gieße!

Die Idee leit doch gor nit sou fern,  
des macht sicherlich ach en Zimmner gern.

Sou macht sich en Woihändler flugs uff die Reise,  
un holt sich e Fässche zum fairen Preise

Doch vun de Palz dorch die Käffer bis fast nach Haus,  
rickt unnerwegs plötzlich die Feierwehr aus.

E schmerisch Ölspur zieht der hinner sich her,  
un fährt als weirer wie woann nix wär.

Erst in Zimmern ougekumme,  
hot er die Verfolger woahrgenumme.

Doch wos e Glick, dass des sou ist,  
häwwe mer ja en clevere Ortspolizist.

Der dutt sein Finger in die Spur enoi stecke,  
un emol gonz genisslich do drou lecke.

Zu Protokoll werd also gewwe es is wie´s is,  
dass die vermeintlich Ölspur nur Ferreweißer is!

Hätt der Moann gewisst, dass des Fässje treppelt wie en Laster,  
hätt der sich den Weg in die Palz spoarn kenne un hätte noch sein Zaster!

Die gonz Aktion woar äwwer e riesen Schau,  
drum singe mer zamme des Lied:"Kornblumenblau."

---

---

Mer häwwe oa politisch Gruppierung un des sinn jetz koa Bosse,  
die häwwe letzt Joahr oan lous gelosse.

Vum Parlament die Termine kennt mer in den Kaste do hänge  
Is doch koa gruoß Ding dut ehr eich sicherlich denke. ....

"De Schaukaste uff, den Zettel erinn,  
die Story is ferdisch, das woar doch nit schlimm??!!"

....

Äwwer!!! ..... en schriftliche Outroach is aus dem Gonze geworn  
un musst als TOP in e Gemoindesitzung, ... zum Achim soim Zorn.

Do musst mer Diskudiern un driwwer schwätze...

Obschtimme,

Protokolliern,

Kopiern und verdaale,

des gonze noch obleije nach Datum un Zahle...

Weije oam Zettel do in dem Kaste, in de heutische Zeite....

Die Sach´ hot also Geld un Zeit gekost, un die Gemoa is fast pleite.

Ehr liewe Parteie, Fabb is egal, doch die oa Grupp´ vorneweg:

Macht eich emol Gedanke um eiern werkliche Zweck!!!

Singe will ich dodezu nix, do bin ich gewiss nit alloa...

Do fällt mer blouß oans oi: ...Prost Gemoa

---

---

Wou mer´s groad vum Geld hadde.....

Plötzlich vierehalb Millione, in de Kass, un die sinn koam geschtohle.  
Dodemit kennt mer doch unser Standesamt wirrer houle.

Oannernseits:

es Ortschild word neilich wirrer e Schdiggsche noch Dibborsch versetzt.

Woann´s eijendwoann beim Sauer schteit häwwe mer doann Gemoagrenze verletzt?

Ich det soue, die Kreis(el)stadt Dibborsch, die sagge mer oi.,  
un die B26 es best glei mit debei.

Doann mache mer e Maut uff, de Haushalt wär saniert,  
interessiert uns doann, wos mit denne vierehalb Millione bassiert?

Äwwer: unser Geld doun mer all brauche, die Soie sinn werklisch alt,  
drumm foahrn mer aa scheij mit 30 Sache Richtung Wald.

Sou schnell wie die Schilder kumme woarn, sollte se aa wirrer verschwinne,  
Äwwer uff de Gemoa dutt mer als noch Argumente degeie finne.

---

Noch sou e Ding:  
Zimmner Denkmäler, ehr werd´s sicher all wisse,  
die wer´n grundsätzlich erst emol obgerisse.

Vor poar Joahr beim Eco, die Hall woar glei fort,  
des Joahr on de Russehit, drauße vor´m Ort.

De Ziejelei ehr Wänn sollt eischentlich bleiwe,  
...jetz is se doch fort, ehr Leit wos e Pleite.

In e nei Haus soll ´se verbaut wern, des will koaner bestreite,  
äwwer wer kann des bezoahle in de heutische Zeite?

Woann des doch oaner packt, donn geb ich dem oan aus  
und spende dem Bauherrn en dicke Applaus.

Doch jetz zum Gedenke an´s Denkmal „drauße vor´m Ort“  
singe mer ´s Lied vun "...die Wänn is fort!!!"

Un Des Oane muss isch noch lous wer'n, bevor ich glei geij,  
de Blick in die Presse dud als emol weijh!!!!

Uff de zwat Seit´ im Bläatsche doun´se Veroinsmeldunge drugge,  
do muss mer schun manschemol dobbelt he gugge.

Do steijn doann Termine vun letzt´ Woch un nit vun moije,  
un die Gemoa macht sich iwver die Belegung vum Glöckelsche Soije.

Un wann mer nit eh wisst, was in Zimmern dutt bassiern,  
werd iwver Sache geschrewe wou Koan interessiern.

...En neie Kreisel in Dibborsch, DES sin Meldunge wert,  
äwver häbt ehr im Friejjoahr vum Kerbveroin soine Wahle gehehrt?????

Mer sinn hier in Zimmern un nit bei Denne do hinne,  
uff diese Meldung MISSE mer de Kerbmarsch jetz singe!

Des woar die Kerbredd, jetz isses vorbei,  
Ich hoff es hot gefalle un es woar in de Reih.

Wemm´s nit gefalle hot sollt nit veel driwwer schwätze,  
wonn´s äwwer oig scheij woar doann kenne mer glei zamme oan petze.

Un nemmt nit alles sou ernst es sollt´ jeder emol lache.  
Sou isses halt wonn oam bassiern sou dabbische Sache.

Es is scheij do in Zimmern, ich fraahn mich do zu wohne,  
Gebbt mer Owwacht, dass nix bassiert, doann doun mer eich nächst Joahr  
verschohne.

Und nun zu guter Letzt un ohne zu prahle,  
kimmt jetz fer uns all es grouße Finale:

Drumm hordisch groad he geschdellt un die Hänn uff die Brust.  
Jetz kimmt noch die Hymne und doann is Schluss!!!